

## VII - POSTULATIO PALLIORUM

**Deinde Revmus D. Cardinalis Micara, nomine Emi Cardinalis Marchetti Selvaggiani, postulavit S. Pallium pro Cathedrali Ecclesia Ostiensi.**

**Personaliter vero institit pro Pallio suae Metropolitanae Ecclesiae Archiepiscopus Pisanus.**

**Per procuratorem autem facta est postulatio Palliorum ab Ecclesiis patriarchalibus : Alexandrina Coptorum, Babylonensi Chaldaeorum, Antiochena Melchitarum. Item ab Ecclesiis métropolitains : Nasiensi, Corycensi, Quebecensi, Coltimbensi in Ceylon (per successionem), Albornensi, Chamberiensi, Tranensi et Barolensi, Baltimorensis Reginatensi, Tegucigalpensi, Camberriensi et Crulburnensi (novae erectionis), Angelorum in California, Omahcnsi, Olomucensi; atque ab archiepiscopali-bus : Atheniensi et Vashingtonensi.**

## MOTU PROPRIO

DE INSTITUTORUM SAECULARIUM LAUDE ATQUE CONFIRMATIONE

## PIUS PP. XII

**Primo feliciter elapso anno a promulgata Apostolica Nostra Constitutione *Provida Mater Ecclesia*,<sup>1</sup> cum ob oculos multitudinem habeamus tot animarum absconditarum « cum Christo in Deo », <sup>2</sup> quae in saeculo ad sanctitatem adspirant totamque vitam « corde magno et animo volenti » <sup>3</sup> in novis Institutis Saecularibus laetanter Deo consecrant, facere non possumus quin Divinae Bonitât! gratias referamus, de novo hoc agmine, quod exercitum consilia evangelica profitentium in saeculo adauxit ; itemque de valido subsidio quo nostris hisce perturbatis luctuosisque temporibus catholicus apostolatus providentissime roboratus est.**

**Spiritus Sanctus, qui faciem terrae tot tantisque malis in dies desolatam et deturpatami recreat et renovat incessanter,<sup>4</sup> multos dilectissimos filios et filias, quibus peramanter in Domino benedicimus, magna specialique gratia ad se vocavit ut, in Institutis Saecularibus, collecti et**

<sup>1</sup> Cfr. A. A. S., XXXIX, n. 4, p. 114.

<sup>2</sup> *Col.*, III, 3.

<sup>3</sup> *II Mac.*, I, 3.

<sup>4</sup> Cfr. *Ps.* CUI, 30.

ordinati, insulsi ac tenebricosi mundi, de quo non sunt<sup>5</sup> et in quo tamen ex divina dispositione remanere debent, sal indeficiens sint quod, vocationis ope renovatum, non evanescit ;<sup>6</sup> lux, quae inter ipsius mundi tenebras, lucet et non extinguitur ;<sup>7</sup> ac modicum sed efficax fermentum, quod semper et ubique operans omnibusque civium ordinibus, ab imis ad summos, permixtum, eosdem singulos universos verbo, exemplo cunctisque modis attingere ac permeare nititur, donec integram massam ita informet ut fermentata in Christo sit tota.<sup>8</sup>

Ut ob consolantem eiusmodi Spiritus Iesu Christi<sup>6</sup> effusionem tot Instituta ubique gentium orta, ad normas Constitutionis Apostolicae *Provida Mater Ecclesia* efficaciter dirigantur, atque eos optimos sanctitatis fructus, qui sperantur, copiosissime ferant; itemque, ut solide et sapienter in aciem ordinata,<sup>10</sup> praelia Domini, fortiter in peculiaribus ac communibus apostolatus operibus praeliari valeant, memoratam Apostolicam Constitutionem magna cum laetitia confirmantes, matura deliberatione adhibita, Motu proprio, certa scientia, ac de Apostolicae plenitudine potestatis haec, quae sequuntur, declaramus, decernimus ac constituimus :

**I. Societates, clericorum vel laicorum, perfectionem christianam in saeculo profitentes, quae elementa ac requisita in Constitutione Apostolica *Provida Mater Ecclesia* praescripta certa plenaque ratione habere videantur, non debent neque possunt inter communes fidelium Associationes (cc. 684-725) arbitrio, quovis praetextu, relinqui, sed ad propriam Institutorum Saecularium naturam et formam, quae ipsorum character! ac necessitatibus apprime respondet, reducendae atque elevandae necessario sunt.**

**II. In hac Societatum fidelium ad superiorem Institutorum Saecularium formam elevatione (cfr. n. I), atque in omnium Institutorum, sive generali sive etiam singulari ordinatione perficienda, illud prae oculis semper habendum est, quod proprius ac peculiaris Institutorum character, *saecularis* scilicet, in quo ipsorum existentiae tota ratio consistit, in omnibus elucere debet. Nihil ex plena christianae perfectionis professione, evangelicis consiliis solide fundata et quoad substantiam vere religiosa, detrahendum erit, sed perfectio est *in saeculo* exercenda et proficienda ; ac, proinde, cum vita saeculari in omnibus, quae licita sunt et quae**

<sup>5</sup> Cfr. IOAN., XV, 19.

<sup>6</sup> Cfr. MATTH., V, 13; MARC, IX, 49; Luc, XIV, 34.

<sup>7</sup> Cfr. IOAN., IX, 5; I, 5; VIII, 12; Eph., V, 8.

<sup>8</sup> Cfr. MATTH., XIII, 33; / Cor., v, 6; Colat., v, 9.

<sup>9</sup> Cfr. Rom., VIII, 9.

<sup>10</sup> Cfr. Cont., VT, II.

cum eiusdem perfectionis officiis et operibus componi valent, accommodetur oportet.

Integra vita sodalium Institutorum Saecularium, professione perfectionis Deo sacra, in apostolatum converti debet, qui ita ex puritate intentionis, ex interiori unione cum Deo, ex generosa oblivione fortique sui ipsius abnegatione, ex animarum amore, est perpetuo sancteque exercendus, ut non minus interiorem spiritum prodat, quo informatur, quam ipsum continuo alat et renovet. Hic apostolatus, qui totam vitam complectitur, tam profunde ac sincere in bis Institutis persentiri iugiter solet, ut, Divinae Providentiae ope atque consilio, animarum sitis et ardor non tantum occasionem vitae consecrationis dedisse feliciter, sed magna ex parte suam propriam rationem et formam imposuisse, miramque in modum, finem, quem specificum appellant, genericum etiam finem exigisse atque creasse videatur. Hic apostolatus Institutorum Saecularium non tantum *in saeculo*, sed veluti *ex saeculo*, ac proinde pressio-nibus, exercitiis, formis, locis, rerum adiunctis saeculari huic conditioni respondentibus, exercendus est fideliter.

III. Quae ad canonicam disciplinam status religiosi spectant Institutis Saecularibus non competunt, nec generatim legislatio religiosa, ad normam Constitutionis Apostolicae *Provida Mater Ecclesia*, ipsis applicari debet aut valet (Art. II, § 1). Illa ex adverso, quae in Institutis inveniantur amice cum ipsorum caractere saeculari coniuncta, dummodo plenae totius vitae consecrationi nullatenus officiant et cum Constitutione *Provida Mater Ecclesia* cohaereant, conservari possunt.

IV. Hierarchica interdioecesana et universalis constitutio ad modum corporis organici Institutis Saecularibus applicari valet (ib., Art. IX), et haec applicatio absque dubio internum vigorem, amplio-rem et efficaciorum influxum atque constantiam ipsis conferre debet. Tamen in hac ordinatione, singulis Institutis aptanda, ratio haberi debet naturae finis, quem Institutum persequitur, maioris minorisve ipsius expansionis propositi, eiusdem evolutionis et maturitatis gradus, rerum adiunctorum in quibus versatur, aliorumque id genus. Neque sunt illae Institutorum formae reiiciendae, aut despiciendae, quae confoederatione fundentur et characterem localem in singulis nationibus, regionibus, dioecesibus, retinere ac moderate fovere velint, dummodo rectus sit et catholicitatis Ecclesiae sensu informatus.

V. Instituta Saecularia, quorum membra, etsi in saeculo commoran-tur, ex plena tamen Deo et animabus consecratione quam, probante Ec-clesia, profitentur, et ex interna ordinatione hierarchica interdioece-sana et universali, quam diversis gradibus habere valent, inter status

perfectionis iuridice ab Ecclesia ipsa ordinatos et recognitos, ex Apostolica Constitutione *Provida Mater Ecclesia* iure meritoque numerantur. Consulto igitur illius S. Congregationis competentiae et curae Instituta adiudicata et commissa fuerunt, quae de statibus publicis perfectionis regimen et curam gerit. Hinc, salvis semper, ad canonum tenorem et expressum Constitutionis Apostolicae *Provida Mater Ecclesia* praescriptum (Art. IV, §§ 1 et 2), iuribus S. Congregationis Concilii circa communes pias sodalitates piasque uniones fidelium (c. 250, § 2) et S. Congregationis de Propaganda Fide circa societates ecclesiarum ad seminaria pro exteris missionibus (c. 252, § 3), omnes societates ubique gentium — etsi ordinaria vel etiam pontificia approbatione suffultas —, cum elementa et requisita Institutorum Saecularium propria habere noscantur, ad hanc novam formam necessario illico redigendae sunt, secundum normas supra dictas (cfr. n. I), atque, ut directionis unitas servetur, uni S. Congregationi de Religiosis, in cuius sinu speciale de Institutis Saecularibus Officium constitutum fuit, merito attribui ac devolvi decrevimus.

VI. Moderatoribus vero et adsistentibus Actionis Catholicae aliarumque fidelium Associationum, in quarum materno gremio ad vitam integre christianam simul educantur, et apostolatus exercitio initiantur tam numerosi atque electi iuvenes, qui ad altiora assequenda sive in Religionibus ac Societatibus vitae communis, sive in Institutis etiam Saecularibus, superna vocatione invitantur, paterno ex animo commendamus, ut sanctas eiusmodi vocationes generose promoveant; ac non solum Religionibus et Societatibus, sed his etiam vere providentialibus Institutis, adiutricem manum praebeant, atque libenter, salva interna ipsorum disciplina, eorundem opera utantur.

Horum omnium, quae Motu proprio constituimus, fidelem executionem S. Congregationi de Religiosis aliisque supra recensitis Ss. Congregationibus, Ordinariis locorum ac Societatum quarum interest Directoribus — quatenus ipsa ad singulos pertineant — auctoritate Nostra committimus.

Quae autem his Litteris, Motu proprio datis, statuimus, ea semper valida et firma esse iubemus, contrariis quibuslibet non obstantibus.

Datum Romae, apud S. Petrum, die xn mensis Martii, anno MDCCCXXXVIII, Pontificatus Nostri ineunte decimo.

PIUS PP. XII